

## بیر گنجه اونونلا آستارادا ایکن

– «...سعدی صانکی منیم ایران سفرلریم بارهده دئیمیش بو جمله نی: به خاطر داشتم که چون به درخت گل رسم دامنی پر کنم هدیه اصحاب را. چون برسیدم بوی گلم چنان مست کرد که دامنم از دست برفت». بونو دئدی و اوزون بیر صوصقونلوغا قاپیلدی.

اونو صون یولچولوغونا گؤنده ریرمیشم دئمک. سن دئمه بیرداها گؤروشمه یه جه ایدیک. گومان ائله بونا گؤره ده قوجا کیشی یاتماق ایسته میردی.

گنجه یاریسی دینجه لمک و بیر آز هوش قاپماق اوچون مهمانسرای آستارا داکی اوطاغیمیزا چکیلدیک. کیشی یاتماغا صویوندو گؤزلرینی یومدو و خورولداماغا باشلادی. خورولتوسو ایله قاه - قاه گولمه سسلری بیریرینه قاریشدی. گولمکدن او یانیب اوتوردو. دورمادان گولوردو، قاقیلدا بیردی. «من خورتدادیم» دئیه یئنه گولوردو. نهده اوزدن گنجه یین آغجاقانادلاری وارمیش بو آستارانین دئییردی. صانکی آغجاقاناد اونو قیدیقلا بیرمیش او میغمیغانین صانجماسیندان دا گولوردو. دوغروسو منی ده گولمک توتوموشدو.

یئنه یاتدی و یئنه خورولدادی.

و ... یئنه یوخو ایچینده شاقیلدا ییب گولوشمه یه باشلادی. غریبه بیر ایچدن لیکله گولوردو. بو دفعه آستارالی تاکسی سوروجوسونون سؤزو یوخودا یادینا دوشموشدو.

آستارا سرحدلر آچیلدیقدان صونرا یامان بیر سرعتله بؤیومکده ایدی او قدر کی بیز رستم معلم له آستارانلی اؤلجه اؤلجه مهمانخانانی ایتیردیک و بیر تاکسی یا مینمه یه مجبور اولدوق تاکسی شوفری بیزه «ایستی سوز سیزی دهنزه چکیم؟» دئدی. بیز بیر آنلیغا بو سؤزدن شاشیرصاقدادیلچی فیلان اولدوغوموز اوچون همن اونون نه دئمک ایسته دیگینی آنلاینجا سوء تفاهم رفع اولموشدو. سن دئمه آستارالی لار دریا (دیز) یا «دهنز» دئیه لر. بودا بیر خئیلی گولمه میزه سبب اولدو. و گنجه یوخونون ایچینده رستم بیگی گولدورن ده میغمالار یوخ بو دهنیمیزه چکیلمه سی مسئله سی ایمیش دئمک. رستم معلم گولمکدن آمان تاپدیقجا او سؤزو تکرار لاییردی... دهنزه چکیم.

دوروب تکرار گئیندیک - کئچیندیک و یولا قویولدوق. باش آلیب دنیزه دوغرو گئدیردیک. قارامسار بیر جوان کۆپک ده قویوغونو بولایا - بولایا دالیمیزجا دوشموش بیزیمله گلیردی. ملایم بیر آسینتی بیزیم یارالی گؤزلریمیزی اوخشاییردی. صویوق آیازدا ایستی بیر یئل ده بعضاً اوزوموزه توخونوردو غریبه ایدی بیر بنا قاپیسی نین قاباغیندان کئچسه ایدیک ائله بیلردیک کی ایستی اوردان گلیر. او ایسه بیز آچیق لیق دان کئچیردیک. من بیر آز صاغا - صولا هرله ندیم. نهایت ایستی نین آچیق بیر دالان کیمی اوستوموزه اسدیگینی سئزدیم. رستم ده کئفلی لر کیمی او دیوار سنین بو دیوار منیم

ائله ییردی. اودا ایستی نین جهتینی آختاریرمیش. ایستی دریانین اوز به اوزوندن اسیردی. رستم، «آده زلزله اولور» دئییه آددیم لارینی سرعتله ندیردی. گۆزلریمیز اراده سیزجه گۆیه چکیلدی. گۆی ده قیپ - قیرمیزی قیزارمیشدی. باشیمیزین اوستونده گۆی آلوو تپیردی. بیر آندا باشیم گیجه له نمه یه باشلادی. آیاقلاریمی چتین لیکله چکه بیلیردیم. لپه لرین اؤنلندیریلمه سی اوچون ساحله دوزولن صیلدیریم قایالارین اوستونده ایدیک آرتیق. دنیزه چاتمیشدیق رستم قولتوغوما صوخلوب منه توتوندو. «گۆزلریم قارالیر» دئدی. «دنیزمی توتوب منی؟» صوروشدو.

افقه زیلله نیب ایره لی گئدیردیک. من باریتون سسله بیر سؤزلری اوخوماق اوچون سسیمی باشیما آتمیشدیم. رستم نارین نارین آغلاییردی. اوزوموزه چیسگسن اوتورور کیمی هر دن یاغیش چیله نیردی و دامجی نین دوشدو یئر کۆزه صو تۆکولور کیمی سسله نیردی. رستم چوخ شاعرانه تیره ک بیر سسله منه بو مصراع لاری اوخودو:

بنال بلبل اکر با منت سر یاری است

که ما دو عاشق زاریم و کار ما زاری است

صو گؤبگیمه چاتان کیمی بیردن رستمه باخدیم آخی اونون بویو مندن آلچاق ایدی. بیردن بوغولار دئییه اونو توتماغا چالشدیم او تنها صونا کیمی دنیزین اوزونده سوزور اوزوردو... گئتدی و گۆزلردن ایتدی.